

四庫全書

集部

欽定四庫全書

集部  
四溟集卷三

詳校官中書臣涂日煥

侍讀臣孫球覆勘

總校官知縣臣繆琪

校對官編修臣沈清藻

謄錄監生臣楊金

欽定四庫全書

四溟集卷三

明謝榛撰

五言律詩

武皇巡幸歌

神武驅兵日南征氣赫然射蛟江水上立馬石城邊羽  
檄飛三楚霓旌拂九天功成凱歌夜月色送樓船

二

齊魯巡遊地蒼生見紫微晴雲隨鷁舫春水照龍衣柳  
畔千官擁沙邊七校圍觀魚移白日鼓吹月中歸

三

玉輦衝寒色蕭蕭八駿鳴兔河冰上過狐嶺雪中行撫  
劍羣蠻遁彎弓百獸驚當年赤帝子空到白登城

四

年少羽林郎嚴冬較獵忙旌旗開御道劍戟擁長楊飛  
去五花馬射來雙白狼中官傳賜酒甲冑拜君王

有感

薄伐元中策論兵自古難漢唐頻拓地將帥幾登壇絕  
漠兼天盡交河蕩日寒不知大宛馬曾復到長安

春夜即事

春草非吾土春宵還自悲庭虛風稍靜簾捲月何遲久  
病兒知藥長吟妻解詩他年學耕稼肯負鹿門期

麗情曲

昔會春江曲美人知我心朝遺白玉佩夕贈紫瑤琴夢

入楚天遠愁連湘水深刺桐花又落黃鶯斷佳音

春宮詞

盈盈上陽女愁思起中宵月白瑤窓靜花深玉輦遙曉  
霞憎國色春柳妒宮腰不見長門賦傷心有阿嬌

清涼山秋夜聽兒元燦彈琴

吾兒解幽事露坐一彈琴聲落石崖迴興當秋夜深潭  
龍乘月色山鬼傍松陰颯颯天風起清商滿翠岑

暮秋對雨感懷

山昏雲到地江白雨連天鴻雁寒無賴芙蓉秋可憐旅  
懷聊獨酌世事且高眠悽惻登樓賦誰知王仲宣

俠客行

家住渭橋邊追隨俠少年鬪雞輸寶劍逐兔落金鞭日  
下長楸陌霜高太白天新從霍驃騎裘馬獨翩翩

秋野

地闊清霜滿林寒赤葉稀野雲秋澹澹山日晚輝輝殺  
氣三河動邊聲一騎飛中原多猛士誰解晉陽圍

暮秋即事

十見黃花發孤樽思不勝  
關河秋後雁風雨夜深燈  
留滯悲王粲交游憶李膺  
相隨少年子走馬獵韓陵

同宋子純杜約夫晚渡漳河訪李淑東

幽期何憚遠秋色滿山川  
月出平林外人行落雁邊  
水村時下馬沙岸夜呼船  
正有東籬菊相拚醉裏眠

宿淇門驛感懷

駐馬淇門夕空堂暑氣徂  
暝煙官樹合寒雨驛燈孤  
濁



酒聊幽興悲歌亦壯圖  
相違舊朋好三徑日荒蕪

毛侍御仁甫幽居

早年歸別業高枕遠浮名  
樹杪孤雲度門前一水橫  
黃花留晚計白鳥識幽情  
為愛嵇中散疏慵是養生

登天壇山

直上斷岸懸崎嶇一徑緣  
白雲秋滿壑紅樹老參天  
神護軒皇鼎靈通太乙泉  
何由結丹侶共此學長年

春園

水村人寂寂遲日啟柴關菜甲春初細園丁雨後閒沙  
邊來白鳥柳外出青山此地多幽意行歌薄暮還

送杜太僕謫荊州

謫宦三十里誰憐賈傅才漢江秋月上楚岫夜猿哀心  
事登樓賦年光落帽臺知君最愁絕湘雁逐春來

南園秋暮

地僻青山近庭空白露溥鳴蟬秋共老落木夜多寒惆  
悵鄉書滯疏慵世路難遙思籬下菊兒女不同看

隆慶道中有感

馬度黃雲塞鵬飛白草原  
兵戈連歲動霜霰入秋繁  
農業千家廢人煙幾處存  
中途有行子佇目亦銷魂

榆林道中言懷

秋風吹短褐長嘯過居庸  
羸馬有歸思枯蓬無定蹤  
山橫邊色斷日沒野陰重  
旅鬢成衰颯誰知阮嗣宗

初冬夜同李伯承過碧雲寺

並馬尋名寺登高藉短筇  
飛泉鳴古澗落月在寒松  
石

路經千轉雲巖復幾重人間多夢寐誰聽上方鐘

送史德龍下第歸江都

送送蕪城客南歸暫索居沙雲鷗鳥畔江雨稻花初白  
髮愁看鏡青山坐讀書漢庭知己在早晚薦相如

暮春晦夜同馮汝強汝言昆季餞別章行人景  
南使上黨得光字

官舍延星使燈前數舉觴何當添夜漏聊復駐春光鴻  
雁北來盡關山西去長贈君有芳草歲晏莫相忘

夏夜獨坐披襟當風頗有秋意賦此寄懷

散髮南樓夜偷然披素襟蛩聲依草際螢火落牆陰老  
破當年夢秋生久客心遙思苔石上坐聽美人琴

夏夜集王元美宅同朱伯鄰馮汝言吳峻伯徐  
汝思李于鱗得絲字

獻賦長為客風塵鬢易絲投珠遠自惜倚玉幾相知庭  
曠生秋早城高度月遲聊同河朔宴定擬竹林期

禪林寺贈本無上人

步屨來金界鳴鐘落翠微松陰迴古殿山氣入秋衣身  
向諸天老心從初地歸後期薜蘿月寧遣夢中違

盤山最高峯遲應瑞伯不至

仄徑高盤壁孤峯半插天人行飛鳥上袖拂落霞邊澗  
水寒逾咽山花晚自妍一樽遲儔侶松月向誰圓

楊以時復遊都下

亂後相逢日論交半已非謀生雙鬢改感舊十年歸帆  
落煙中浦琴鳴竹裏扉重來傍燕市霜露滿秋衣

夜集有客憶江南梅花

坐有三吳客天寒重所思梅花何處發  
春信隔江遲雪月搖疏影山村出幾枝  
羅浮遙入夢鄰笛不須吹

除夕示兒元炳兼憶元輝諸兒

對汝還成嘆寒更坐轉深異鄉垂老計  
春草隔年心蠟炬明殘夜天風破積陰  
遙憐幾稚子酒罷一長吟

重過張氏園林二首

駐馬深林下名園兩度遊獨尋花裏徑  
更上竹西樓池

鳥閒相語山雲澹不流却思離亂日松菊負高秋

二

隨處攜鳩杖狂時倒鶻冠晚山當座出風竹滿樓寒獨酌世情遠長歌春事殘不知桃李發白首幾迴看

曉起

曉起正科頭時聞花外鳩出門疎雨歇倚杖斷雲流綠草偏依水青山半入樓况逢春酒熟不負嗣宗遊

晚過西湖



悵望西山路曾經塞馬過重來把楊柳獨立向煙波日  
影峰頭盡春寒湖上多漁樵一相見猶為話兵戈

夜自西湖循甕山同玉峰上人步歸蘭若

湖色冷春衣沙禽夜尚飛路隨山下轉僧伴月中歸祇  
樹藏金界禪燈出翠微他年謝靈運結社願無違

秋夜柬李通政子漸

燕地逢君晚秋來樽酒期桂花相對夜烽火共憂時月  
隱長安樹雲低太液池誰能上封事獨有納言知

秋夜東張給事仲安

青瑣鄰丹禁天階逼斗樞宮雲兼樹冷海月傍簾孤諫  
草勞深思年華感易徂相逢北來使幾為問邊隅

冬夜范憲伯堯卿宅同許憲副子春得天字

宦情與客思歲杪共悠然雲暗春前樹山明雪後天浮  
沉惟短褐聚散幾芳筵莫惜今宵醉相期動隔年

趙王枕易見寄

有酒熟花香春未老好  
携書劍早歸來之句

江海通元氣風雲入浩歌行人猶未返芳草欲如何沙

晚間鳧雁山春秀薜蘿淮南賦招隱悽惻感情多

留別郭學士質夫

學士同樽酒相知老去深青雲司馬賦白日董狐心春  
氣浮東閣晴光動上林應憐多病客歸卧薜蘿陰

元夕道院同公實子與于鱗元美子相五君得家  
字

長空月正滿遊騎隘京華夜火分千樹春星落萬家乘  
閒來紫府垂老問丹砂笙鶴歸何處依稀見彩霞

憶王屋山

昔探王屋勝猶憶杖藜初野老窺丹洞山靈護寶書雲  
生苔壁暗松響石壇虛欲訪煙蘿子茫茫失舊廬

寒食旅懷

薊北驚寒食淹留幾自嗟春風來燕子落日在桃花丘  
隴行邊淚江湖夢裏家不知疏懶客何物是生涯

還鄴二首

客路多芳草還家春服成交游嗟獻賦妻子問謀生自

得山林計深知猿鳥情一樽吟薄暮風雨閉柴荆

二

迢遙囊橐輕詞客本無營久別兒孫大初歸雞犬驚幾年  
違舊業多事感浮生坐倚中庭樹春風可寄情

登泰山

登攀絕頂處封禪斷碑文古洞尋丹液秋衣拂紫氛下  
飛闕塞雁東接海天雲惆悵秦松在寒濤空自聞  
春同陳郎中汝忠登鄴城燕寄于鱗子與

有客停驂日重城共一登晴煙開北渚春色上西陵中  
論懷徐幹高風識李膺蒨門芳草路千里興堪乘

暮秋東園餞別鄒子序

老大交彌重窮愁賦可傳對君猶故國嗟我異當年砌  
冷蛩邊草霞明雁外天菊花留醉客秋色滿離筵

暮秋大伍山禪院同孟得之盧次梗醉賦

勝遊隨故侶幽興在禪林石上晴雲起松間晚磬沉青  
山無久客黃菊有歸心我亦悲秋者樽前學楚吟

寄吳總戎子陽

黃鬚鄴下子威振北征年  
萬里能籌國三秋長在邊  
草枯馳馬地霜冷射鵰天  
燕趙多豪士論功誰更先

寄李殿元子實

暫假淮南去長吟桂樹秋  
自知班史在還結楚騷流  
山色朝侵榻江聲夜滿樓  
應懷金馬詔春水送仙舟

野興

獨眺西山色蒼然風物繁  
漁樵秋草路雞犬夕陽村  
積

水明荒澤間雲度廣原阮宣今已矣沽酒共誰論

高枕

垂老惟高枕經秋不到城孤吟來鳥雀萬事掩柴荆野  
曠浮雲色庭虛落葉聲祇應鄰叟過共話薜蘿情

晚眺

寒日下西陵漳河晚渡冰孤城歸獵騎雙樹隱禪燈野  
眺心何遠巖棲老未能翻憐戎馬日愁思坐相仍

歲暮宴李太守于鱗宅



別來吾叟老薊北尚征塵詞賦偏憂國聲名實在人風  
驅平野霧地轉濁河春俠氣空成嘆荆鄉舊入秦

二

為郎殊客禮領郡重予招積雪留孤館飛觴動幾宵有  
家何處定多難此身遙國士淹今日應悲豫讓橋

送別楊中貴使武當

登覽君何處雲霞滿太和身輕鳥外轉心定虎邊過紫  
極飄鐘磬丹梯上薜蘿采芝獻帝子靈秀得來多

春日大風集馬雲從園亭有感

春風何太急野水忽波瀾天遠孤鴻落亭虛萬竹寒田園殊愛靜稼穡久知難百感逢今日蕭條醉裏看

送鄴宰石中美轉永州別駕

策馬零陵道關山渺萬重霜明三楚樹雲亂九疑峰宦迹驚秋草憂心坐曉鐘佩刀應不負幾為問邊烽

初春侯兵憲舉舜宅同潘別駕時乘賦得明字

共酌憲臺晚揮觴催賦成旅懷春慘澹吾鬢雪分明倚

竹三湘夢披雲五嶽情有人正吹笛風散落梅聲

暮秋夜東宗上人

山城搖落夜感慨幾人同舊館殘孤燭秋原老百蟲才  
疏漂泊際心定寂寥中亦有逃禪意明朝過遠公

登樓晚眺達軒子同賦

客子聊乘興王孫共倚樓風煙平野夕砧杵異鄉秋半  
醉還成賦同懷豈倦遊望中有漳水解傍鄴臺流

秋夜宿東林寺

籠中一燈盡籠外幾蛾回夜久僧同話霜明門半開寒  
聲虛竹院秋色淨蓮臺還擬東林約孤筇踏月來

次張祐金山寺之韻

孤絕寒逾迥蒼茫夜不分僧歸依島月龍定縮江雲天  
漢窓前合風濤枕上聞好沽瓜步酒詩思在微醺

除夕西巖君見過同酌

春光在何許客裏只燈花分却梅窓興來尋草舍家夜  
寒餘巷雪暝色聚城鴉明日誰同醉應思舊歲華

春日書懷

遠道馳鄉夢，歸期隔歲華。  
山川醉裏賦，雞犬客中家。  
巷僻餘春雪，城高駐晚霞。  
鄰翁訝疏懶，相見問生涯。

送徐生歸臨清

婚嫁了心事，翻多千里情。  
關山渺行色，風雨緩歸程。  
舊業浮雲盡，新愁芳草生。  
故園春又老，黃鳥斷腸聲。

夜過昭覺禪院，因憶懶上人同南泉西巖西池  
諸丈賦得嗟字

重到談經處蕭條人共嗟  
禪心餘貝葉老眼訝天花  
孤磬風猶裊雙松月自斜  
太虛渺無際知是遠公家

昭覺禪院同南泉西巖二君賦得天字

相約多幽事頻來有靜緣  
法雲高捧月祇樹暗藏天  
垂老堪投社無心自會禪  
誰為息機者默坐奕碁邊

寄孔方伯汝錫

事有關天地誰當著述名  
山林一身重鐘鼎幾人輕  
芳樹杯中色流泉枕畔聲  
應憐玉堂月遊宦老方城

次張汝任圓通閣餞別韻

倚閣憐分袂，祇園夜尚遊。  
松深孤磬落，杯滿數星浮。  
別浦蒹葭暗，他鄉蟋蟀秋。  
誰知獨醒者，平子不同愁。

雲川書齋同雲洲諸丈留別賦得多字

六月期幽賞，銀塘有芰荷。  
詩從年老健，情到別時多。  
夜濕草間露，秋橫天上河。  
王孫共今夕，郢調付雲和。

七夕敬誠二君餞別得秋字

北斗掛城頭，明河迥不流。  
人間清露夜，天上白榆秋。  
聚

散多歧路悲懽自女牛誰知老來拙回首故鄉樓

積雨感懷

積陰無曉夜雲氣壓城頭雀共疎簷雨人同老樹秋晉  
山何慘色汾水亦橫流此俗非荆楚鄉心重倚樓

暮雨

坐聽蕭蕭急無風池亦波庭花秋幾許窻雨夜偏多老  
矣鄉關夢悲哉燕趙歌不須臨曉鏡空自嘆蹉跎

秋日自遣



甘向清時隱無令素願乖存虛饒氣色撥累緩形骸葉  
響風前樹苔青雨後階何須學宋玉登眺苦秋懷

中秋有感

客邊無節序吟嘯往時同故里苔三徑名園桂幾叢琴  
樽孤夜月朋舊各秋風坐對青山好蒼茫灑氣中

郊送張肖甫

平子愁能賦予愁更幾何淚中心事盡客裏世情多青  
眼交仍好黃花節又過離亭獨悵望車馬渡汾河

秋懷

東望太行路巉巖幾斷崖  
易歸千里夢難遣  
九秋懷夜色霜明樹寒聲  
葉滿階著書思趙邨  
靜掩舊茅齋

無營

無營詩亦苦謾說有營勞  
鳥宿三更轉松涼孤月高  
客情疏晚計人事重秋毫  
我欲棲林壑忘言醉濁醪

倚樓

應接妨詩興淹留倍旅情  
別家仍有累浮世豈須名山

遠暮霞色林疎秋雨聲此樓非我室愁思度陰晴

送兒元炳東還

吾兒同入鄴今日汝先歸留滯鄉音改飄零舊業違關  
河通古道風雨暗春衣寄我思親淚西原洒落暉

十四夜無月

皓魄將圓夜張燈坐草堂孤城低雨色萬戶失秋光笛  
裏關山暝樓前煙霧蒼金波若滿地隨處有壺觴

三臺

歌舞千年計鸞輿去不回豪華空四野霸業有三臺水  
閣雲仍度沙寒鳥獨來黃花風露裏寂寞為誰開

夜宿齊嶺口

空林煙火夜茅宇暫幽棲缺月低松杪流星墮嶺西浩  
歌當綠酒逸興在丹梯不見功名客飄然獨杖藜

夜登瑤臺

瑤臺當絕頂乘月一躋攀河嶽憑閣外星辰拂袖間身  
輕雲自度心遠鶴俱閒幾欲招仙子天風聽珮環

山晚

日落川原迥商歌獨放情千峰連暮色萬木亂秋聲流  
水相迴合間雲自送迎人家隔煙浦燈火望中明

同孟懷之錢子青酌白雲洞

古樹敞巖扉相攜傍翠微興高松鶴下坐久洞雲飛天  
地浮生老山林勝會稀不知蟬冕客白髮幾人歸

春閨

深院飛花急臨風祇自哀又看春色老坐使玉顏摧落

月窺琴室流塵上鏡臺  
窻前有梅樹歲暮待君開

春歸有感

雨歇上林靜春歸東閣虛  
欲煩青鳥使遙寄美人書  
柳出宮雲外鴉鳴海日初  
只今彈鋏者不為食無魚

送吳子遊秦嶽

送爾西江客探竒東嶽峰  
斷丈餘漢石古色有秦松  
倚杖海天近聽泉雲壑重  
金箱閱丹訣誰共訪仙蹤

送周藩王廣文歸錢塘

長安芳草歇多病賞心違落日三江滿秋風一櫂歸雨  
來寒雁失潮上夜鐘微梁孝懷詞客無勞訪釣磯

八月十三夜譚鴻臚子羽第同李太史子寔張  
給事吳卿莫膳部子良賦得秋字

當樽月欲滿良夜故同遊宮闕散清霧星河懸素秋病  
多還授簡客久數登樓喜結淮南侶非關桂樹留

苗仲材告別登樓晚眺得天字

青山出半天一帶迥蒼然亂樹餘秋色寒城更暮煙交

游多惜老離合幾經年共有登樓賦誰為王仲宣

送王端甫歸浦坂

惜別京華道秋風送馬啼日斜孤雁外家遠萬峰西歸  
計聊樽酒行歌且杖藜何時首陽下共爾弔夷齊

送陸秀才歸華亭

九月清霜下三江白舫歸芙蓉寒始發鴻雁暮還飛自  
許同張翰誰憐滯陸機讀書滄海上燈火映林扉

周子才惠菊并酒



分我名園種迎霜花正開故山有籬落秋色此亭臺坐  
賞成孤酌吟看信幾回因君興不淺昨遣白衣來

登榆林城

憑高望不極天外一鴻過萬嶺夕陽盡孤城寒色多蘆  
笳滿亭堠羽檄度關河遙憶龍庭士嚴霜正荷戈

落花有感

花開驚節序花落轉堪悲物色殊無意春風暗有期蝶  
迴芳草徑鶯度夕陽枝獨有豪華子青樓醉不知

望西山

西山久不到花鳥向何人  
風散石崖雪天開湖水春  
老僧虛白社騷客負青蘋  
底事燕京陌黃塵滿角巾

贈平鄉趙隱君

風霾起薄暮有客嘆歸歟  
白首猶懷刺青山且著書  
故鄉春樹外別館夜鐘餘  
不見磻溪叟終然載後車

野望

西北消烽火邊關罷檄書  
寒聲惟鳥雀野色但村墟  
石

禿燒山後崖明帶雪初誰為籌國者雲物渺愁予

聞岢嵐被兵

三冬幾烽火諸將亦豪雄月冷胡笳斷雲低漢壘空  
勳名身後別邊議眼前同枯木惟啼鳥淒其向晚風

除夕有懷

除夕歸期過孤幃嗟未休翻疑寇消息轉使客淹留  
積雪寒連塞明星曉近樓遙知不寐處併得兩年愁

客居即事

客居何懶慢過午尚科頭老得醫書喜間增詩債愁春  
寒風偃樹天晚雪明樓莫謂常漂泊西來是壯遊

遊水竹園孔丈同賦

移得南山竹冰霜見苦根春流觸自響清影暮何繁色  
蘸杯中綠涼沾雨後痕鄙枚此同賦勝事即梁園

次宋伯鎮遊王文父西園韻

郭西車馬路塵外薜蘿園樓迥晴雲合庭間秋艸繁素  
心猶白鳥幽事且芳樽地勝人多賦青山誰並存

李子田有事代州聞敵犯羊防口幡然歸縣賦此

寄懷

遷客復行役翩翩向代州  
塵飛隨宦轍雲暝結邊愁  
歸鳥異鄉樹悲砧何處樓  
黃花老山縣相待幾枝秋

東林寺夜集不與次西巖君韻

廬山在咫尺鐘磬落諸天  
不到真如地遙看香積煙  
輪蹄雙樹下語默一燈前  
欲問無生法衰頽獨慨然

雨後送劉孝夫東歸

相見淒涼色孤懷風雨天黃金交易薄清鏡老堪憐馬  
出燕南路家臨濟北田送君一長嘯高鳥沒蒼煙

京師大雨

夜來雨何急睡起問兒曹秋響門前水寒生樹裏濤素  
居鄰市井老計託風騷好為衝泥去新豐貫濁醪

中秋夜南園同故人酌

不謁金張第相期松桂邊人須今夜酒月朗故鄉天歸  
思逢秋色狂歌度老年陰晴如可定早上玉峰顛

送王給事佐之潞州封王

路出西山遠城依上黨高白雲何處望赤日此行勞帝  
子周封建天臣漢節旄晝遊還洛下氣色滿宮袍

薄暮趙戶部良弼官署西園同鄭山人中伯醉  
賦四首

薄暮偶乘興開樽非預期野夫偏坐久庭雀故飛遲地  
拔羣松勁天成片石竒種蔬甘此味還使後人知

二

要識為農苦官園半畝禾有才知計遠無事閱書多  
童子琴樽待山人杖屨過長吟見幽意獨鳥下庭柯

三

園中有亭沼宦邸得幽棲曲折由人勝深沉使客迷  
竹枝風外裊蓮葉雨中低我欲盡竒絕明朝還杖藜

四

騷雅成幽賞相依古樹叢未論金谷勝真與漆園同  
宦迹風雲轉時擢郎中  
督儲遠左王程闕塞通隨君秋夜夢乘月過



遼東

暮秋集小山王孫第分得新字

悲秋仍兔苑華髮幾莖新黃菊頻催老青山久待人交  
情且樽俎世事各風塵醉別王孫去天涯草自春

送范中丞堯卿鎮贛州

朔雁催行色江天入望遙旌飛秋草岸船壓夕陽潮有  
賦思梁宴虛心聽楚謠霜威及嶺外千里瘴煙消

二

九月虔州去天南宿霧開揚帆生遠思秉鉞見雄才地  
轉三吳盡山連百粵迴夜深瞻北斗獨上鬱孤臺

題山水圖

川原人不到盡日草亭間秋晚樹搖落天高雲往還沙  
邊多白鳥湖上一青山榜子復何處暝投紅蓼灣

二

石樹重陰合郊亭遠色分泉飛半空雨江落數峰雲幽  
興自深坐長歌誰更聞申生今白首無意待玄纁

寄南都毛明府正之

久宰南都邑烏臺空薦書  
詎知人事巧翻使宦情疏  
梅雪清相映山雲澹自如  
大江春水發應有北來魚

洛陽懷古

百戰龍蛇定中原舊帝居  
邙山誰酌酒落日自停車  
漢室浮雲過周京亂草餘  
卽今蘇季子祇合老田廬

宿少林寺同莫陳二秀才

蘿逕通深處蒼然峭壁重  
吟成太室雨坐久少林鐘  
習

靜聊今夜探竒復幾峰還期共禪榻莫負歲寒松

達摩洞

長江折蘆後面壁此高岑祇樹抱巖古法雲垂洞深石  
存一片影天印萬年心徒使登攀客松風聽梵音

張德徵汗中見訪僕已過杞兩不相值

相尋非預期乘興我何遲兩地琴樽夜同懷風雨時苦  
吟燈自對良晤夢先知好共碧筒飲荷花香滿池

答沈禹文見寄

未息吳中戰寧聞燕市歌一官身事重長夜國憂多古  
道淹騏驎秋山老薜蘿趨朝成百感風色動鳴珂

送吳逸人汝震歸甬東

有客嘆無魚河亭送別初馬歸梁園路兵阻越鄉書野  
岸滄波轉霜天赤葉疎世情堪一醉還定海門居

靜公園借居

欲覽匡廬勝衰年惜未能栖遲無俗侶幽寂共隣僧禪  
定階前石心空夜半燈浮圖著靈異昨上最高層

維揚兵後寄張僉憲士直

羽書飛不絕東望海天遙  
旗雜廣陵樹兵喧揚子潮  
材官曾幾戰壯士莫輕招  
獨立多悲感江城颯晚飈

寄豫章周子乾

解官君獨早南北募兵年  
烽火端屋外雲霞高枕邊  
放歌行野寺垂釣坐江船  
剩有閒園地開池種白蓮

寄陸太守子部

目極九江水誰傳雙鯉魚  
城當吳楚地天逼斗牛區  
懷

古雲西駐求賢榻左虛郡齋梅正發歲晚意何如

送黃隱君南歸

黃生久不見一見即言歸落葉世情薄浮雲生事微潮  
聲隨晚櫂江色照寒衣還醉莆中酒春風自掩扉

哀江南八首

為說江南勝豪華異往年波濤揚子夕風雨秣陵天歲  
苦兵間賦春荒戰後田都門遲飛輓何處泊吳船

二

昆明未習戰南伐轉憂深  
兵氣連瓜步人煙斷柘林  
吳姬窮海淚燕將故關心  
何日饒歌轉蒼生望捷音

三

戰馬嘶江上寒生楓樹村  
新兵五都盡舊業幾家存  
共倚中朝盛誰將上策論  
梁鴻避世者寧復老吳門

四

召募今南討中原羽檄過幾年  
紆策定一戰賞功多霧  
變青山色天橫滄海波飄零  
國士老長望一悲歌



五

華亭未奏捷烽火更西湖海艦賊來去天兵功有無人  
心多為漢國計竟全吳野哭徵求盡蒼茫寒月孤

六

古來兵不到湖裏洞庭山日慘干戈際雲愁猿鳥間少  
年應習武幽士且栖閒縱熟黃柑酒誰能長醉顏

七

江山天設險滿目戰圖秋東海兵傳擢西風客倚樓朝

廷存大體斧鉞繫深憂不信征南將功成早白頭

八

氛祲頻年動東南盡處看海搖千艦出兵犯七閩寒殺  
伐寧無定憑陵信有端遙聞日本使猶自貢長安

過清源故居有感

予故居今屬  
王氏南村

舊業成睽遠親朋久失羣百年生長地一片往來雲獨  
立空流水長吟但落曛結茅何日定西隴事耕耘

二

飄零三十春下馬問比鄰相見弟兄老堪嗟門巷新行  
蹤猶泛梗世故一浮塵王謝豪華地殊非舊主人

贈別史郎中應之還張秋

一見遽言別其如南北情君今何水部吾豈謝宣城帆  
影樹中出河流天際平誰無感懷賦兩地共秋聲

二

安平南去道官署在河潯一水風煙色三秋魚鳥心才  
高君柱石計拙我山林應念離居者蟲鳴蔓草深

謝劉監察質卿見寄

清霜肅海岱春到野夫邊  
驄馬勞今日蒼生望有年  
舊交仍杖屨遐思各雲天  
為問齊中俗何人似魯連

九日方晦叔同登北城樓兼示真上人二首

相期賦九日倚堞興何饒  
天若來風雨人應感寂寥  
長河明遠色寒柳淨疎條  
更愛東林勝談禪坐此宵

二

登高有惠遠攬勝即廬山  
幽事知誰重浮生得此間  
乾

坤惟舊侶霜露各衰顏莫待黃花老明朝更一攀

重九夜吳希實隱君館陪餞君惜詩人

開樽當節序歸思莫匆匆秋色猶南菊寒聲自北鴻幾  
人心迹定萬事古今同曠達真吾輩何如粟里翁

二

茱萸共把翫聚散復何愁秉燭重陽過移樽片月留我  
拚同調侶君醉異鄉秋別後多詩興還登何處樓

酌翁子書見示新作

病餘秋思動對月幾吳吟江上多尊菜山中有橘林感  
因為客久情豈在交深安得共耕鑿相期松柏心

暮秋東徐別駕載卿

南征秋轉劇不寐夜漫漫白髮艱虞盡滄洲去住難旌  
旗連夜暗兵甲照江寒選將須史事誰能議築壇

寄塞上路監察子中

沙漠動霜威巡行久未歸眼中求將畧意外得邊機日  
落馬南顧天寒鷗北飛莫令諸俠少爭獵向金微

暮秋聞倭寇稍平寄上南都大宗伯孫公兼懷

太史文和二首

纔罷江南戰，憑高動越吟。  
濤聲翻日暮，兵氣結秋陰。  
聽履青天遠，含香紫霧深。  
世傳修漢史，誰識二班心。

二

省中霜葉下，百感向斜暉。  
北餉多留滯，南征幾是非。  
寸丹經國遠，尺素到家稀。  
共擬孫弘閣，無勞說布衣。

老懷

殘年百事過閱世復何言多病仍春草全家豈故園遊  
絲風不定亂雀日相喧我欲從丹侶青山靜掩門

送許殿卿守建寧

移官君獨遠惆悵撤離筵山轉荆南路江浮蜀外天自  
能歸異俗幾為問荒田到日梅花發春生五馬前

贈盧次梗

五年君一到未是曳裾頻曉發黎陽騎宵探漳浦春交  
游魏公子懷抱楚騷人好覓滄洲侶相將采綠蘋



二

誰識豐城劍  
天空紫氣高  
老來悲道路  
醉後益風騷  
物議冰霜過  
才名歲月勞  
一寒今范叔  
誰復贈緜袍

三

五十君多感  
艱危不可忘  
自知兄弟少  
寧為鶴鷓傷  
漢黨無文字  
燕歌獨醉狂  
莫違湖海興  
徒自老黎陽

哭弟松

多病吾仍在  
沉酣爾遽休  
相依堪共老  
永別杳難求  
伏

臘還新酒風煙豈故丘  
漳河暮轉急鳴咽正東流

二

吾弟忽長往孤魂應向東  
在家憂患過為客去留同  
白日身何懶清樽老不空  
至今城北路隴樹起悲風

寄懷徐以言

東山在上虞縣西  
南謝安舊遊於此

罷官還舊業應起著書樓  
海鶴當庭下溪雲拂檻流  
獨醒風雨後高卧甲兵秋  
况有東山勝堪追謝傅遊

寄李僉憲師孟

楚客限王程春風遊宦情山連吳地闊天與浙中平烽  
燧勞東望干戈甚北征莫教終孺子獨為請長纓

劉侍御叔清擢守扶風賦此寄贈

旌節發河陽君行西路長心懸隴上月威帶日南霜入  
郡春隨馬談兵秋滿堂于今汲長孺易使髻毛蒼

王元美鎮青山賦此寄懷

當年客燕市官舍每經過促膝寒燈盡論心夜雨多別  
來成老病愁裏問干戈北海開樽日何人共醉歌

秋日東方晦叔兩江

端居何思遠名士亦心勞  
巨筆凌班史秋懷得楚騷  
虛清桂露庭迥急松濤  
詩草人爭寫三齊紙價高

寓居禪院申明府幼川携酒過夜

禪扉夜尚開何意冒寒來  
好客無餘俸為官不盡才  
冰花明古樹燭影動春杯  
落盡孤城月乘酣車馬回

吳人鄭速季入鄴省兄中伯每談倭寇之亂久  
而思歸賦此以贈三首

驅馬來河朔雲愁故國睎干戈身是贅道路酒為家海  
戍多歸雁江城幾落花白頭弟兄在急難復何嗟

二

江南兵未息朝野共憂端戰伐疲吳稅功名老漢官天  
空山霧慘地坼海濤寒妻子書難達華亭夢裏看

三

我惜吳門客言歸動是哀形容愁裏變離亂死中來家  
遠身猶滯田荒賦幾催時清渡江去長嘯虎丘臺

湧金亭同冀定甫馬伯齡醉賦

百泉聲不斷風雨亂滄波地接煙嵐迥天開靈秀多  
古  
人餘勝事今代有狂歌為愛蘇門好攜樽共一過

寓晁太史湖亭王樂三見過同酌

子猷吾舊好乘興過林扉席外滄波近歌邊白鳥歸  
浦  
煙開霽色松日轉春輝學士呼新酒寧教幽事遲

贈別

北上千秋籙西歸萬里橋黃花空有約綠酒不同宵  
樹

擁秦雲斷山懸蜀棧遙艱難杜老在莫謾簡書招

樓居秋夜

短筇不到地老子愛樓居徒綺常科髮疏慵肯著書窓  
高生月早簷迥接天虛萬戶燈明滅秋光澹自如

寄懷許伯誠

發軔遼陽雪還家韋杜春客疏門自掩官罷酒相親白  
首歌今代青山夢古人行藏不可問獨鶴下西秦

寄李員外秀夫

久別誰先老西風兩地心  
海天來朔雁關月起秋砧  
性懶交游少才高感慨深  
遙憐松桂色寂寞華山陰

卧病張肖甫枉顧時奉使還蜀

蜀客來千里相看慰病顏  
心馳消息後義重死生間  
飛夢通秦塞緘書度漢關  
登高不同賦秋色滿河山

枕上病懷贈陸道丞兼謝枉駕

卧病勞相問茫然意答遲  
科頭何氣色拊背獨心知  
地濕霜凝草庭喧雀滿枝  
君看燕趙俗豪士豈長悲



秋夜竒上人禪房獨坐

久寄青蓮宇因之問上乘自知閒有味不愧老無能響  
徹秋風樹寒生夜雨燈匡林坐幽寂身似定中僧

送吳君搢歸新安二首

燕趙久為客乘秋鳴櫂還獨吟霜月曉幾轉荻蘆灣朔  
雁驚心後江城屈指間竒峰三十六天際識黃山

二

故國多形勝青山擁萬重溪南歲暮雪石上古時松留

客呼新酒敲碁度  
暝鐘春來覓詩處  
誰繫野雲踪

有懷

秋風起鄴城  
重我故園情  
林壑居難定  
漁樵計未成  
野雲隨浪迹  
村酒脫浮名  
欲賦多憂思  
何如阮步兵

寄懷王子梁鎮鄜州

君乘舊驄馬  
西望渺黃河  
春色關中滿  
霜威塞上多  
宦情逢羽檄  
世事起商歌  
獨夜耿無寐  
星光搖太阿

中秋無月

連宵雨太急仙桂失清芬四野明秋水孤城亂暮雲陰  
晴何處定悲樂此時分不見山河影笙歌空自聞

冬夜范憲伯堯卿宅同許憲副子春得天字

宦情與客思歲暮共悠然雲暗春前樹山明雪後天浮  
沉惟短褐聚散幾芳筵莫惜今宵醉相期動隔年

謝子明別業對酌

背郭茅亭子照鑣薄暮來田夫掃徑罷庭雀出墻回地  
僻隱狐兔園荒迷草萊主人久不到黃菊向誰開

可嘆

世事底相迫人間誰獨醒  
行歌仍白石把闕且黃庭  
山迥雲時出天高霜夜零  
棗苑無久色松柏向人青

久客

為客不知久同懷相見頻  
河山偏入賦風俗更留人  
鏡裏雙愁鬢燈前一病身  
菊花零露滿秋色幾枝新

過故居留別王南村先生

爾居吾舊業吾弟久相依  
往事今誰好浮生會自稀  
河

亭聊別酒桑梓共斜暉百感願常健終心殊不違

苦雨後感懷

苦雨萬家愁寧言客滯留蛙鳴池水夕蝶戀菜花秋天  
地惟孤館寒暄一敝裘須臾古今事何必嘆蜉蝣

嘉靖癸卯歲曾寓道院屢登玉清閣以發吟興  
於今二十七年矣衰頽且病竟不獲一登漫成  
小詩以志感嘆云爾

幾欲登仙閣年來筋力衰山青不在眼雲白更依誰碧

海三山夢瑤臺萬里期老夫仍世累且報木公知

孟縣道中

村家農事畢積雨漫成河白聚野鳧淨紅垂秋柿多年  
衰仍浪迹轉調是勞歌一誦鷓鴣賦歸歟向薜蘿

二

去去已言倦秋天菊正花陰晴客在路南北雁為家薄  
俗身難定浮生鬢易華仙人不可見何處問丹砂

夜雨徐明府子研枉駕旅寓

冒雨一乘興僕夫應畏難交從今夕定情自故鄉看城  
迥鐘相隔槐疎鳥共寒攜樽慰旅况馮缺不須彈

暮秋夜集劉兵憲子禮宅賦得秋多二字

離合半生夢招呼三逕游鄴中惟病客洛下幾名流石  
潤苔含雨庭間菊占秋還憐竹西月移席整觥籌

二

堂上琴樽設門前杖屨過壘山成地秀種苗得秋多佳  
會偏傾倒餘生幾嘯歌相期共幽事城市有煙蘿

暮秋夜雨同溫純甫方敏之集呂子性書齋對菊

席畔幽芳合相留客盡歡天將雨色暝夜使菊花寒取  
醉飛觴促題詩翦燭看晴明復何處搖落感秋殘

同鮑叔愚鄧廷獻二明府同觀太乙泉流觴

靈源噴薄處並駕遠看來野鳥夕爭下山花寒自開流  
觴幾曲水倚杖半巖苔秋興能同賦誰齊潘岳才

山縣久雨感懷



雲慘失峰巒林深鳥自安山城七日雨客舍九秋寒綠  
酒愁邊盡黃花醉後看癡兒問行路不道僕夫難

謝仲川雪中見過時予未起

高枕奚童報知君冒雪來陰晴門外變騷雅卧中裁寒  
色侵衣濕冰花著樹開于今誰有賦方見謝家才

初秋同劉兵憲叔清游五龍山值雨得天字

飛旌向何許深入萬松煙草濕雲邊徑山昏雨外天興  
高窮勝迹政美見豐年誰識君侯意臨風一慨然

次潘王殿下秋夜小酌之韻

為愛雲山色憑高望幾回孤吟方露下百感復秋來夜  
爽風鳴樹天清月在杯共言今子建八斗不凡才

過西池書齋賞菊

培養鄰三徑移來殿萬芳餘花自風景幽意合柴桑繡  
幕駐秋色金杯浮晚香主人益多珍詎敢傲飛霜

敬軒誠軒携酒見過西巖西池同賦

日落寒城閉天空倦鳥歸高樓纔暝色新月亦清輝秋

興騷人賦鄉心客子衣王門豈無事載酒過玄暉

冬夜過雲洲翁留酌因赴西池君不果

眼前期不定萬事遠期難酒熟山人過詩成蠟炬殘  
柝聲連巷動月色滿城寒歲晚梅花發誰同雪裏看

同程太守子晉過昭覺禪院

使君重惠遠頻往興逾高共欲參禪妙何心索句勞  
霜明分夜色松響亂寒濤更話睢中事憂端在二毛

十六夜同南菴翁遊昭覺禪院醉筆漫書

客子來金界王孫駐玉鞍春通九衢夕風閃萬燈寒改  
席鐘聲度當杯月影團明年曠顏色勝景憶同看

夜過達軒同仁軒分得清字

幽齋幾翦燭相與話深更戶牖敞虛白星河懸太清悲  
歌燕俠志醒醉楚騷情當代能多賦應齊勒鼎名

春日東李之茂

君逢初度日閉戶正思親綠酒誰開甕班衣自積塵斷  
雲愁色裏獨樹淚邊春今夕應無寐啼鳥莫傍人

謝敏軒惠酒

太行三晉路留滯幾書還  
亭館仍春雪雲霞豈故山  
客愁醒醉裏臘味有無間  
何限王門酒能滋衰老顏

東栗別駕道甫

曾賦南陽勝登臨諸葛廬  
宦情歸舊業老計著何書  
高枕浮雲過孤樽落月虛  
帝京多故侶誰復問閒居

雨中過昭覺禪院同雲洲文敬誠二君賦得多  
字

不辭冒風雨地勝此經過  
逕滑人留迹林寒鳥在柯  
疏狂緣醉甚老病得閒多  
更欲尋禪侶青山共薜蘿

東南泉君園居

幾日違禪宇遙聞鐘磬音  
誰同賦詩興自定爽襟心  
雨歇亭臺爽煙含花竹深  
眼前幽意足清曠亦山林

暮雨有感

西來一片雨遽作萬家秋  
寒逼今宵夢聲牽故國愁  
城高斷鐘響野曠溢河流  
秉燭貴公子仍躑金谷游

園亭月下觀妓分得戲字

月白池臺迥徵歌客共酣名花出山右春色似江南漏  
轉仍呼酒參橫尚駐驂重來賞音處感舊對何戲

過誠軒君賦得登樓對月得河字

樓高仍綺席月朗亦金波垂老酒杯倦先秋詩興多析  
聲空巷陌池影截天河今日頻相接寧忘最後過

驟雨東西岩君

隔院共風雨誰家秋意多簷前走霹靂門外散江河留

滯人扶杖淒涼鳥在柯應思折簡夜乘月幾經過

栗仁甫園亭餞別得天字

偶過設芳筵相留花竹邊離聲楚詞賦行紀晉山川馬  
識往來道雲通南北天憶君池上月應負幾回圓


漳河有感

行經百度水祗是一漳河不畏奔騰急其如轉折多出  
山通遠脉兼雨作洪波偏入曹劉賦東流鄴下過

寄李學憲于鱗



西盡三秦勝拂衣歸故林  
搜詩慘淡色遠世寂寥心坐  
想古人在行看秋草深  
十年白雪調誰和郢中音



四溟集卷三

欽定四庫全書

集部  
四溟集卷四

詳校官中書臣涂日煥

侍讀臣孫球覆勘

總校官知縣臣繆琪

校對官編修臣沈清藻

謄錄監生臣陳翼

欽定四庫全書

四溟集卷四

明 謝榛 撰

五言律詩

寄王蘇州

時有倭寇之亂

嶽牧今逾重，憂端坐永宵。  
歲侵疲郡邑，時議到漁樵。  
雲暗青山路，江喧白日潮。  
傷心兵火後，幾度望楓橋。

武安除夕酌王抑之宅，其子易從，易知侍側。

旅况乘時切年華隔夜新  
捧觴君二子彈鋏我孤身  
地得青山賦天留白髮人  
誰為歲寒侶松老見龍鱗

送程子仁之楚

十日九彈鋏留君竟此行  
鄉心急歲杪客計緩平生  
雪暗梁園樹江空鄂渚城  
不聞王粲賦愁絕滯南荆

寄上趙王枕易殿下

松桂兔園秋誰從帝子遊  
清風聞玉笛夜月見瓊樓  
旅雁復南下官河長北流  
應懷謝莊賦吾意老滄洲

寄崔岱屏都尉

望望三秋雁誰傳上國書氣橫龍劍外天遠鳳簫餘歲  
月身還健風雲計自疏瓊筵多勝事詞客復何如

關山月

皎皎長空月星河半有無光連玉關靜寒傍雪山孤沙  
雁時悽斷林猿夜嘯呼征人增百感把劍立平蕪

明妃詞

鳳闕虛歸夢龍城重遠愁黃沙連塞起黑水入荒流淚

盡琵琶夜魂消感葉秋誰憐萬里外風雪滿貂裘

白鼻騮

年少馳遊俠長乘白鼻騮連翩金勒響婀娜玉鞭斜紫陌嘶芳草青門踏落花鳴弓飛鳥墮巧捷萬人誇

春閨詞

楊柳正啼鶯楊花飛滿城春風天外去落日海西明逸氣搖金轡豪華戀玉京不知遊蕩子曾念百年情

晚過李子復餞別

攜樽同此夕雲月有無間曠達騷人意淒涼遊子顏亂  
蟲依草樹孤鳥度河山世路黃金盡秋風一劔還

寄懷蘇廷珪先生

勾漏辭官早丹砂不易成門間二水合天遠一鴻輕為  
客幽期過悲秋白髮生菊花誰共采風雨獨含情

同朱道士通上人夜談因送予歸賦此

二高多道氣來夜訪幽棲瑤草元無種青蓮不染泥鶴  
間丹鼎外月在法雲西相送還成笑分明過虎溪



清明過王郎中學甫時園桃始花留酌

欲訪桃源去先看獨樹春無言當令節有色淨風塵不  
取傾壺醉其如滿眼新仙郎能下榻華月復留人

送唐儀部還瓊州

多病言歸去孤舟祗素琴海天南盡處燕關北來心秋  
老下榕葉沙寒鳴翠禽賦成應有寄惆悵嶺雲深

浪遊

百歲形骸役吾生何浪遊寒蛩知靜夜老菊見高秋海

上白茅屋雲邊青石丘還從物外侶靈藥好相求

送張太僕熙伯視馬畿內

司馭巡畿甸飛旌指戍樓共傳天馬異寧復大宛求月  
照昆吾冷風生苜蓿秋張衡有詞賦獨繫漢家憂

秋夜柬仲元仁

永夜愁歌枕天涯一病夫候蟲當砌亂秋月傍樓孤采  
菊還三徑揚帆更五湖相將好歸去莫嘆歲華徂

李行人元樹宅同謝張二內翰話洞庭湖

詞客家何處西南是岳州地連湘樹闊湖共楚天浮極  
目風煙夕驚心鴻雁秋君山更竒絕應待子長遊

二

南望岳陽郡蒼茫吳楚分帆迴孤島樹樓出九江雲落  
日浪中沒秋風天外聞何時采蘋藻湖上弔湘君

送朱邦憲還上海

送君不可住霜露滿幽襟醉後登樓賦天涯抱玉心江  
門開曉色海樹帶秋陰歸去鶴亭上遙聽吳會吟

居庸關二首

遙遙度關塞策馬正西風  
驛路泉聲裏人家嵐氣中  
霜餘澗草歇日上石林空  
多少長征客高秋感塞鴻

二

控海幽燕地彎弓豪俠兒  
秋山牧馬處朔塞用兵時  
嶺斷雲飛迥關長鳥度遲  
當朝有魏尚復此駐旌旗

春夜過王侍御子梁宅時將按河南得韻二首

烏棲官舍靜步屨偶經過  
宿霧浮金闕春星動玉河  
交

情別後重逸氣醉來多好去梁園道因風寄薜蘿

二

送君向河嶽歸思渺難堪回首鴻初北當歌月正南宮  
雲飄祖席御柳駐征驂去後聽黃鳥芳菲誰共探

春日

共道芳春好其如老病侵誰同一樽酒時醉百花陰應  
接非吾事疏狂見客心因思故山侶悵望白雲深

送趙元哲下第歸東阿

久客山中夢孤懷月下歌青雲期賦就華髮感時過龍  
劍閒星斗魚山靜薜蘿東歸訪黃石吾道欲如何

陳駕部錫卿來自錢塘舟次臨清適有汀州之  
命貽書見懷用答

海門春水發吳舫到何遲芳草行吟處孤鴻入望時滄  
江成遠別白首見相知欲賦三山勝茫茫不可期

二

往年君別處梧葉正秋彫猶憶琴樽約曾同風雨宵寒

空鳴雁急煙浦去帆遙猶有天南夢相隨度海潮

三

使君遙領部相對復何年海樹曉行外江蘼秋思邊城  
臨百越地帆盡七閩天見說春風早梅花可更傳

四

春酒不同醉春花空復開美人臨衛水客子滯燕臺近  
得銅章報翻令錦纜回天知有黃霸早遣渡江來

端午集吳郎中峻伯宅得山字

令節方牢落，招攜慰旅顏。  
綵絲憶兒女，蒲酒話鄉關。  
楚俗千年後，燕歌一醉間。  
坐看新月色，猶自傍西山。

夏夜集孫員外文揆宅得天字

深夜移官燭，清風啟客筵。  
鐘沉漢苑樹，月度薊門天。  
我愧謝莊賦，人稱孫楚賢。  
何當碧筒飲，醉向北窻眠。

送趙少尹文甫之華陰

燕市離歌動，殊非故國聞。  
清樽聊共我，黃髮更憐君。  
縣隱潼關樹，堂流華嶽雲。  
不知松月下，誰與坐宵分。



夜坐

兵氣動嚴關，纔聞漢騎還。  
邊愁醒醉裏，身事去留間。  
亂響更深柝，空明雪後山。  
苦吟時倚杖，不使客心閒。

東橋為胡太僕賦

西來倚杖處，下有白鷗羣。  
偶爾乘秋興，翻然向夕曛。  
溪光自清徹，野色兩平分。  
不定中流影，相知有片雲。

將登五臺夜宿圭峰禪房

驅車林壑晚，不覺路縈迴。  
鐘響禪扉近，僧迎山火來。  
登

攀惟一徑開闢自多臺上有古松柏當年誰為栽

圭峰晚望

圭峰冠形勝幽事且禪林石閣參雲興山橋俯澗心萬  
松皆古色孤磬自清音更覓最奇處寧辭冰雪深

山行有感

地僻逢人少同行自有羣幾多山脊雪一片馬頭雲古  
木參天出寒鴉薄暮聞可憐春草發誰為採幽芬

偶成

鄉園尚隔越寒暑又經過晚計身無補新交事轉多間  
時自天地靜處即煙蘿白鳥忽飛去悠然一浩歌

留別陳大參粹中二首

征驂聞早發客自塞門歸天暝烏棲樹城寒雪擁扉美  
人仍兩地春夢不相違獨賦關山月茫茫共素輝

二

別後緘書少天驕數往還正憂烽火急翻羨草茅閒積  
雪猶平澗殘陽半在山相逢春尚淺楊柳未堪攀

寄太和山何隱君二首

棄官依白嶽歲月此棲遲  
道侶頻相過丹經久自知心  
閒虎嘯處步緩鶴隨時倚杖看晴色  
前峰又采芝

二

太乙壇前客桃花十度紅  
幽棲片石定元氣四時通  
古樹鄰蒼壑間雲澹碧空  
能談非靜者真意幾人同

雨後立夏

園中綠已暗寂寞問花神  
興託清樽酒愁欺白髮入山

城初雨過天地尚餘春又與東風別堪嗟羈旅身

送薛逸人歸荆南

河汾春色過此別路三千旅夢關山月鄉心風雨天馬  
歸湘竹外城對楚江邊去住何須嘆荆王自下賢

寄徐水部有和

粉署當形勝虛懷誰似君樹涼沙市雨江白渚宮雲鶴  
鶴翩翩下帆檣歷歷分楚童能艷曲不使水曹聞

北園同孔老賦得風字

悠然雲在空此意許誰同身出勲名外心歸恬澹中高  
樓偏夕照深竹自涼風試問今秋興還添菊幾叢

夜雨

夜來殊不寐百感古今情道在楚騷重年衰燕俠輕軒  
庭回爽氣風雨失殘更多少人敬枕中心別有營

宋伯鎮招飲署中賦得長字

綠草夾階長憑軒共晚涼鳥聲投暝樹霞影蘸清觴興  
劇三秋賦年衰幾日狂今宵話離合風露滿衣裳

雨後早起

積雨空階滿，開軒幽興深。  
半窗低曉月，幾處苦秋陰。  
已倦人間路，能間詩外心。  
還憎多此癖，習靜老山林。

秋雨宿權店驛有感

驛燈分暝色，野館滯秋陰。  
已倦衰年事，偏馳故國心。  
夜涼槐雨滴，月暗草蟲吟。  
歸夢不知路，千山雲更深。

積雨感懷

十月天多雨，霏霏日夜寒。  
西山改氣色，北斗失闌干。  
生

計門常掩悲歌燈又殘可憐黃菊老幾向病中看

初冬十五夜雲洲丈招遊東林得僧字

皎皎東林月初看法鏡升殿沉中夜磬松隱上方燈興  
劇催銀筆詩成轉玉繩地非廬霍勝天許著名僧

李園暮雪同鎮康安慶二王偶成

帶雪幾歸鳥蕭然集舊柯樹明春意早庭敞暮寒多綠  
醕同梁苑清才並郢歌還期看山色天外玉嵯峩

冬夜昭覺禪院示萬燈上人



舊衲燈前補天寒霜滿庭不眠中夜偈早起半函經慧  
力剗諸障禪心通百靈臘同祇樹老春雨又青青

寄懷顧近湖比部

莫測文園志龍光薄海天遙知變化日稀見老成年客  
路西淹晉神州北壯燕白雲樓上賦秋色滿高筵

憶都門酒家玉四

尚憶高樓飲青帘出綠楊頻賒寧沮興浩唱不嗔狂謝  
客惟深醉燕姬自盛妝幾回青夢裏聽雨滴糟牀

九日寄懷田夢鶴兵憲

別後幾重陽  
停雲渺帝鄉  
登高同節序  
垂老各行藏  
夕鳥安庭樹  
秋光照野塘  
何時問幽寂  
歲杪正冰霜

寄顧彭山別駕

建業元佳麗  
風流況有君  
妖童隔花唱  
醉客倚樓聞  
清憶銅臺雪  
春憐金谷雲  
予今非官郎  
猶試寶刀紋

贈田深父

氣奪三都賦  
聲驅六代詩  
春雲流碧落  
秋月照瓊枝  
獨

覽中原勝還收太華奇東山有狂客千里愧相知

西亭中尉雅集

騷侶夜同酌酣歌風月斜古人自風調今代幾名家客  
久髯將雪天寒梅正花誰知獻賦意對爾一長嗟

吹臺弔三賢

李白杜甫高  
適曾會于此

異代懷三老風騷尚可親高名相照耀片石自嶙峋野  
曠青雲暮臺空碧草春至今遺響在神鬼泣何人

中秋夜潞陽旅館同馮員外言別得分字

客亭逢此夕樽酒况同君  
月向中秋滿人從上國分  
絳河斜度影白鴈遠呼羣  
回首淮陽路相思隔海雲

秋日即事五首

八月邊烽起燕關  
引弓檄飛三輔道  
氣激五都雄戍角  
寒雲外城烏  
夜色中不知枕戈者  
愁絕竟誰功

二

燕趙多愁日兵戈未定時  
交游疏舊社僮僕問歸期  
驛路當秋斷胡笳帶月悲  
曉來驚旅鬢更益鏡中絲

三

何時偃甲兵多難滯燕城  
寒館下桐葉秋風吹雨聲  
賈生今日淚宋玉昔年情  
共有龍庭策誰高麟閣名

四

旅懷方索寞秋氣重蕭森  
兵甲南歸夢妻孥北望心  
閉城山日在倚劍野雲深  
獨有長安客時時問捷音

五

疊嶂雲仍慘孤村鳥亦稀  
共嗟經鐵馬誰復守柴扉  
戰

地生寒色征旗亂夕暉還思漢飛將逐北過金微

送吳駕部子有奔喪洛中

漠南驚候火洛下報哀音去去思親淚遲遲憂國心暮  
雲中嶽斷秋雨大河深猶憶老萊服空瞻松柏林

二

數有趨庭夢秋來益苦顏高原黃葉下落日素車還髮  
變兵戈後心摧霜露間啼鳥轉淒切淚盡北邙山

九日集徐郎中汝思宅得盃字

連牀留昨夜九日復筵開白髮愁中賦黃花亂後盃霜  
兼宮樹變鴈自塞門來賴是同心者深知庾信哀

對菊

東籬何寂寞不似去年秋菊帶淒涼色人經離亂愁風  
庭寒影動霜院晚香流客裏重陽過悲歌獨未休

馬子端王弼臣見過因懷崔都尉

兵去人心定相逢話此生亂離俱是客去住各含情沁  
水沉鸞影秦臺斷鳳聲眼中惟二子且復醉燕城

秋夜

不見同懷侶悠然獨夜思  
風淒聞角處月落倚樓時  
計拙陶潛酒心憂阮籍詩  
千山芳蕙歇策杖復何之

芳樹

芳樹花爭發嫣然故向人  
相看終日媚一摘暫時新  
影落金塘水香飄玉砌塵  
傷心有琴瑟寂寞漢宮春

鄴下秋懷

風塵勞客計詞賦寄鄉愁  
鴈避燕山雪人經鄴地  
秋幾



年多放浪萬古自沉浮抱膝成孤嘯蒼涼月近樓

奉和崔後渠祭酒見贈

碧山留大老客子幾番來砧杵鳴秋郭風塵上晚臺孤  
懷惟短劍萬事且深杯東閣多賢士寧遺作賦才

寄靳太守子魯

花發上林時君行我在茲三春不相見千里自同思白  
髮留燕市青蘋寄楚詞郡樓應獨眺未擬北來期

題蕭鴻臚文萃園亭

京國論交久知君道氣存買書無積俸好客有閒園月  
近池邊榻雲低花下樽偶來堪避俗何必問桃源

寄趙總戎公僕

聞道干城將頻年未解顏身危征戰後名定是非間海  
月窺龍劍沙雲接鴈山誰憐趙充國白首卧榆關

夜集孫郎中文揆宅賦得月字

關山不見月玉笛未須吹水暗魚龍窟雲深烏鵲枝開  
樽成露坐作賦待秋期還擬梁園夜鄒枚况在茲

秋夜同應駕部瑞伯宿三河驛得宵字

荒村回遠火古驛駐征軺蓬鬢人間老萍蹤薊北遙繁  
星耿秋漢鳴柝亂寒宵忽憶山中挂清霜葉又凋

赴石門峽

石門西去道煙色樹冥冥秋草地全白夕陽山更青聞  
蟲驚節序立馬問邊庭潦倒還詞賦徒慙兩鬢星

石門秋夜有懷

歌馬空山夕勞歌塞上歸野霜明古劍峽月冷秋衣坐

裏蛩蛩亂愁邊烏鵲飛酒杯時在手不與故人揮

春雨感懷

漠漠春天雨冥冥晚樹花山雲迷客路海燕落人家濁  
酒聊生計狂歌任歲華異時懷杜甫老病滯三巴

夏日同武元康劉復之杜約夫萬金渠流觴

城西六月暮笛裏萬山秋野水天光淨沙汀日色浮清  
觴聊泛泛白鳥任悠悠逸少今千載何人復勝遊

送呂試官宗夔入蜀

西蜀有揚馬君才當此行幾年懷勝迹今日慰平生地  
入黃牛峽江連白帝城停驂勒銘處獨見古人情

獨步

野田聊獨步風物漫幽思地迥秋山出天空暮雨垂石  
梁間鶴鶴水國靜蛟螭曠士成衰謝寧無狗監知

暮秋同馮直卿秦廷獻李士美遊黃花山

太行秋色老步屨一探奇草白高歡殿山空王母祠飛  
泉堪倚杖落日尚揮巵松外浮雲去幽人意獨遲

二

高岷翻榭葉白日雨聲寒共愛秋山好其如芳蕙殘  
雲藏怪石空壑下清湍底事林間鶴棲棲刷羽翰

三

深入黃花谷高臨玉女臺迎人千嶂出隨意一樽開  
寒露垂瑤草秋風掃石苔子長耽勝絕猿鳥莫相猜

宿黃花寺

橫野千重壁飛空百丈泉松門臨巨壑石閣架長煙  
月

下惟清梵林中有靜緣此心元不染秋水照青蓮

春日遊清涼山東孟德用

沙暖青蒲出山晴碧樹分琴樽閒傍水杖屨獨披雲曠  
野流春氣高峰駐夕曛芳時不可負寄語孟參軍

北園同劉國藩夜酌

花時招酒伴幾度北林遊改席依芳樹鳴琴對碧流天  
高微月出沙迥斷煙浮明日還乘興垂竿杜若洲

寄郭太史質夫

直北京華地僊郎足勝遊雲低金闕暮月動玉堂秋草  
詔傳天語題詩見國憂茫茫湖海上有客寄漁舟

題背面美人圖

無那琵琶曲重彈調轉淒自傷傾國色故作背人啼太  
液秋光冷長門夜月低流鶯何意思飛過掖庭西

懷僊吟

海上安期子飄然與世違三丘來來藥萬里躡雲歸山  
鬼窺丹竈鮫人識羽衣相從渺何許秋月見餘輝



俠客行

五陵豪俠士意氣欲橫天  
出入長耽酒交游不惜錢  
關雞輸寶劍逐兔落金鞭  
動說成功易如今又幾年

塞上曲

百戰多枯骨秋高白草深  
飛鵬盤大漠嘶馬振長林  
柔遠君王德封侯壯士心  
華夷自有限邊徼莫相侵

丁香

紫花何太媚靜女若為看  
影動簾櫳曉香沉煙雨寒  
芳

菲心有託零落思無端  
一采歸金屋春深莫倚闌

寒食

旅次驚寒食流年鬢有華  
春風吹燕子初日照梨花  
丘壠天邊淚江湖夢裏家  
古來詞賦客拓落但長嗟

南巡歌二首

大道軍容肅中天王氣高  
風雲隨鳳輦日月動龍袍  
綠野開三殿黃河集萬艘  
竟陵恐遲暮原廟薦櫻桃

二

南楚旌旗合黃塵走百官天王重巡幸民物識艱難馳  
道春風動行宮夜月寒萬年垂拱意歌頌入長安

同馮汝隆萬泉山

壑林最幽處亂泉風雨來雲中山路轉樹裏石門開高  
興題蒼壁長歌坐碧苔好為猿鶴主閒醉百年杯

題何栢齋侍郎山居

茅宇依泉石遊心自太空蒼垂松葉露門掩稻花風世  
故端居外天真獨卧中平生愛疏廣今古幾人同

酌五嶽山人黃勉之見寄

人壯三吳地天開五嶽圖  
神交江月迥目極海雲孤  
老鳳鳴琪樹秋花照玉壺  
洞庭騷雅會知爾說狂夫

秋興四首

寥落天涯客誰堪秋氣深  
風煙淒大野霜日淨空林  
對鏡嗟衰白銜杯任陸沉  
子雲多著述百代有知音

二

山昏雲到地江白雨連天  
鴻鴈寒無賴芙蓉秋可憐  
旅

懷須痛飲世事且高眠京國迷茫外空歌美女篇

三

嘯歌誰會意風色動嚴城天夕孤鴻過山秋萬樹鳴故人湖海夢遊子歲時情坐惜瑤芳歇空除又月明

四

地曠糜蕪老庭空蟋蟀寒山河秋瑟瑟風露夜漫漫白首誰同醉黃花祇自看吾生真浪迹滄海一漁竿

伏枕

伏枕無窮事虛堂秋夜深松低半窻月山靜數家砧老  
鶴同幽意寒螿伴苦吟百年兒女計誰識尚平心

晚秋呈崔後渠侍郎

野曠煙嵐重山深杖屨遲菊花留晚色松樹挺寒枝霜  
下百蟲伏風前孤鳥悲蒼生憂悴日獨有老臣知

北塞

朔漠名王遁長城候騎還丁男空郡國甲士壯邊關玉  
劍橫霜冷瑠弓抱月閒于今多上將談笑定天山

秋懷東衛子涵

細雨秋山淨寒煙暮野空  
龍蟠無濁水鳳宿有孤桐  
世業兵戈後年光客旅中  
雲林千古意寂寞幾英雄

春日都下言懷

煮藥花朝過中宵坐黯然  
樓空萬井月樹合九門煙  
多病還詞賦孤懷且歲年  
滄江有白鳥來往釣磯邊

醉馬子端

若木橫西極鯤魚鼓北溟  
壯圖雙鬢黑不寐一燈青  
曙

月低花苑春煙澹石屏上公開閣日暫爾謝山靈

崔太傅北園同張光祿友衡陳禮部子發聞人  
禮部元科吳大理希明得詩字

勝地成高會雲和度曲時百花明院落一鳥下臺池待  
月仍呼酒看山共賦詩鳳城春色暮莫負牡丹期

同內閣張友衡張文光二公飲崔京山園亭

錦石高於屋名香靄若雲笙鏞間清響花草雜幽芬人  
醉瑤京酒天成紫閣文廣除多皓月改席坐宵分



夏日崔西峨宅同張水部德楊醉賦

日暮重門寂風涼獨樹斜一樽元亮宅萬卷子雲家  
白石垂蘭葉清池出藕花水曹同取醉庭宇落殘霞

宿淇門驛懷孫方伯性甫王憲副廷瞻江少參伯陽

駐馬淇門夕堂空暑氣徂亂雲關樹暝寒雨驛燈孤  
身計聊時序鄉心復道途何當報知己秋鴈滿江湖

表兄周平基書至

兄弟成脩阻霜空一鴈過桑麻懷故國煙月夢西河短  
杖徘徊意孤樽慷慨歌相思秋又暮白髮竟誰多

寄王東畬

我遊京國去君向鄴城來自拂燈前劍誰傳花下杯停  
雲虛夜館落月曠秋臺鴻鴈飛何處相思賦七哀

元日

異鄉今日酒無那客愁新風落千林雪天迴萬谷春兒  
童催老大物候感沉淪何限長隄柳青青又向人

古意

南國動幽思  
春洲舉綠芳  
九嶷雲物夕  
帝女怨瀟湘  
華月照瑤瑟  
靈風吹綺裳  
那知苦調罷  
楚客立蒼茫

同李汝錫馬伯齡遊蘇門山東王明府

好山同一賞  
行坐有莓苔  
潭上幽花照  
樽前白鳥來  
放歌風振木  
起舞月臨臺  
欲刻蘇門石  
慙非謝朓才

雨後柬張宗昭

雨後小園淨  
豆花寒更開  
客中秋序過  
燈下鴈聲來  
嬾

慢催詩句疏狂但酒杯故人期不至涼月滿高臺

過山叟

栗里堪同隱濠梁復一過衡門開綠野石壁帶青蘿  
偶共山人醉閒隨牧子歌還憐夜色好星月湛滄波

秋夜柬張崇德

滿天風撼撼木葉下山城夜靜羣蟲響秋高片月清  
多方身計拙無病旅愁輕仲蔚深知已悠悠江漢情

野興

白日霜凝地飛飛鴈度河孤峰依漢迥老樹得秋多月  
曉山精伏時清野父歌短筇隨我意一徑入煙蘿

過儀封呈大司馬王浚川

行客度河甸空林寒日初風高脆蒲葦水落困龍魚民  
物誅求際邊陲戰伐餘濟時須大老莫戀草玄廬

大梁冬夜

坐嘯南樓夜孤燈客思長人吹五更笛月照萬家霜歸  
計身多病生涯髣易蒼征鴻向何許春意徧湖湘

古怨

高樓俯江樹樓上有蛾眉舊約空成歎新愁可訴誰春  
閒翡翠幕月冷杜鵑枝蕩子復何處揚花無定時

二

楊花日飄蕩能復幾何春遠道寧知妾流年不待人片  
雲橫上國獨鳥下西秦無奈懷君意清江採綠蘋

三

綠蘋時復採獨立轉深愁憶昔郎船去極天江水流玉

環應自佩金谷謾長遊可惜鉛華落西風入畫樓

春日同雙泉清泉湧泉西泉四將軍園酌

南園鳴布穀煙雨萬家春庭草亂依榻山雲低傍人當  
歌惟勝地快意幾芳辰醉殺高陽客花前倒葛巾

登城有感奉寄江寧王懷易

野風吹客袂感慨一登城孤鳥日邊沒大河天外傾年  
華悲杜甫世故老虞卿龍劍應相合雲霄無限情

渡黃河

路出大梁城關河開曉晴日翻龍窟動風掃鴈沙平倚  
劍嗟身事張帆快旅情茫茫不知處空外擢歌聲

集孟得之園亭

萬竹生秋意林園六月初騷人宜物色樽酒坐庭除落  
日橫孤嶂清風滿太虛興高歸去晚池上采芙蓉

秋日洹上書懷

水邊沙草合林外石橋橫雲漫三秋色河流萬古聲野  
花欺老髻林酒勝浮名我愛桐江叟漁竿不世情



同李元博攜酒訪岐南道人

共向東園酌蒟蘆  
秋正花千畦  
散流水萬木帶飛霞  
碧海仙人島  
玄都道士家  
未應騎鶴去  
聊此託丹砂

懷玉清閣

紫閣登臨處  
秋光八品題  
窻吞河嶽盡  
簷壓斗牛低  
客路孤城外  
仙壇萬嶺西  
浮丘分袂後  
望斷白雲梯

懷香山寺

曾識京西路  
名山梵帝家  
殿高千嶺樹  
地落半天霞  
空

外鐘聲徹雲邊塔影斜  
老禪相對處笑指白蓮花

送朱君歸都下

君來鄴城雪君去薊門秋  
生計疏鄉信歸期減客愁  
光陰多道路慷慨幾交游  
誰識燕歌處孤雲傍酒樓

送劉僉憲才甫北伐

七月邊烽動三河兵氣揚  
乘秋發猛士計日縛名王  
倚雲霄迥旗連海霧長  
燕然一片石終古有餘光

送杜敬夫有事顯陵

匹馬飛千里孤帆截九河  
天南郢州道月下楚人歌  
陵廟楸梧冷江城雲霧多  
萬年帝靈在神鬼護山河

懷碧雲寺

羣山開寶地憶昔杖藜過  
石洞餘冰雪巖泉淨薜蘿  
虛空塵慮盡疏散勝緣多  
欲結東林社相依老洞阿

同鄒汝鄰張伊梁李元博  
飲申幼川北園登臺

醉賦

朋好多風雅園林復此遊  
天邊數峰出臺下一河流  
浦

樹籠蒼靄霜花照素秋  
騷人嗅芳意莫訝為時憂

同陳石卿夜酌善應山

騷客同今夕當杯意思閒  
天風入古樹海月到空山  
勝賞雙林外高歌萬壑間  
人生竟多事此地幾登攀

送王中書嘉賓歸海陵

華髮紫薇郎鳴鞭下帝鄉  
蓴鱸新味美丘壟故思長  
海國連秋氣江皋帶晚芳  
興來一鼓柁誰與詠滄浪

秋夜寄郭黃州

久別多遐思，驚心夜半鴻。霜飛鄴臺冷，月照楚江空。感  
慨三秋過，徵求萬邑同。細侯深有意，聊爾託長風。

有懷

南國美人別，長懷相見初。不傳萬里信，閒殺九江魚。白  
髮增長嘆，黃花伴索居。夜深風露下，猶自立前除。

寄孫堯峰把總

同衰不相見，憶昔薊門逢。送別吳帆遠，含思燕樹重。湖  
光間鸛鶴，秋色淨芙蓉。月下長安夢，楓橋夜半鐘。

吳下洞庭兩山詩客每從予遊四十年來凋敝  
盡矣率成短律用志悲感

勝地闔閭國滄波范蠡船山通轉折路湖抱混茫天絲  
管春風裏松楸晚照邊人家幾歌哭誰盡白頭年

張二守鳴遠攜酒夜過禪房率爾賦贈

攜酒出偶爾隨意是端居垂老詩猶進能狂禮不疏興  
高雲影外心悟磬聲餘每過論三昧無令禪榻虛

寄楊中丞伯謙

晉俗猶秦俗君來化自同  
多憂關大計兩鎮得全功  
雪盡西山迥雲間朔漠空  
樵蘇幸無事四野共春風

和王侍御沁陽再逢除夕

復此歲將盡烏啼霜滿城  
孤燈千里客夜半兩年情  
北望邊愁劇西來鬢髮更  
乘春發驄馬猶自問蒼生

送欽水部子辰之沛中

清標憐水部南去意何窮  
樹色分淮甸河流見禹功  
亂帆春草外古堞暮雲中  
感慨登臺處蕭蕭起大風

送王行人維藩使汝南

仙郎寵命新向曉發征輪去路梁園雪歸期燕谷春  
王孫瞻絳節侯吏走黃塵想過仲宣宅還憐作賦人

寄北海馮汝強

曠矣青雲路淒其白髮年病多還自遣賦就幾人憐  
三徑迷秋艸孤鴻斷雪天相期九節杖定訪十洲仙

送徐比部汝思使蜀中

何處看春色江城花鳥繁射洪一樽罷騷雅幾人存  
日



下銅山靜雲連赤岸昏更憐陳正字零落獄中冤

二

春草徧三川征軺入蜀年棧通星使路嶺斷夜郎天關  
塞雙旌轉風霜一劍懸勞歌對明月江上幾回圓

春日同李于鱗王元美比部集韋氏水亭得韻

二首

都門聯轡出此地訪煙蘿共酌清樽酒還成白苧歌春  
雲花外度幽鳥水邊多更擬池亭上相將采芰荷

二

我來憑水檻坐久夕陽斜  
聊復祛塵事相將攬物華  
河山百戰地桑柘幾人家  
縱有明春約還看何處花

春遊

古道一鳴鞭蒼茫雨後天  
湖明春草外寺隱暮雲邊  
野浦還垂釣山房欲問禪  
客中幽事少獨愧白頭年

和王比部元美喜澹人盧柟寃雪之作

春從鄒律動近得破愁顏  
心事孤燈下年光萬死間  
賦

成餘白髮身在有青山共爾煙霞約飄然去不還

送蔣判官子重之秦安

策馬齊中道行當佐郡憂城連岱雲起地接海天浮賦  
稅徵兵日星霜報國秋有懷時北望寒鴈下河洲

朱郎中伯鄰養疴道院雨中見召賦此答之

習靜依山侶同懷復見招三花煙雨隔一鶴洞天遙寒  
逼青霞館泥深白石橋月明應不負樽酒聽吹簫

送蘇子冲之雲中

翩翩蘇季子征馬獨嘶風路轉河聲近星搖劍氣雄  
旗間塞上笳鼓靜雲中試看和戎後誰收不戰功

季夏夜過郭學士質夫館得流字

客居度煩暑仙館得清秋華露涼浮動明河夜轉流  
思鄉還自賦秉燭且同遊潦倒誰招隱淮南桂樹幽

同沈禹文周君可二參軍集章子吉參軍宅時  
章景南行人至自上黨即席賦此

使星昨夜轉車騎入長安共喜傳觴好猶言行路難  
蟬

聲風外斷槐色雨中寒起舞蒼龍劍光芒幾度看

登樓北望懷郭學士質夫李吏部一元

李郭風騷匹登樓獨悵然黃花秋滿地白鴈夕橫天玉  
闕雲霄外金門日月邊疏狂燕趙客早晚賦甘泉

夏夜鄒參政君哲宅陪餞皇甫別駕得才字

磊落閩中彥沉淪吳下才相看成別賦一笑且深盃庭  
暗流螢過樓明缺月來新豐能幾醉騎馬故遲回

夏日大雨

小樓動秋意風雨忽來時  
暗失黃塵陌平開綠草池  
朝間成久卧氣爽得新詩  
車馬訪幽獨衝泥竟有誰

遣懷

天地此生浮貪名豈道流  
何為兒女計徒遣歲時憂  
取醉江花日行歌嶺樹秋  
向平元有約南盡白雲遊

立秋夜有感

秋生一葉初搖落重愁予  
宋玉悲何晚嵇康計亦疏  
星明孤劍動月白小樓虛  
為憶同心者天涯未報書

秋夜石戶曹君采宅留別得雲字

無那天涯別寒蛩可更聞燭花還對我尊酒暫同君夜  
駐西山月秋生北塞雲他時重相憶惆悵幾宵分

張少參子明見過

病客掩扉卧時聞車馬臨幾來燕市裏能識魯生心獨  
樹秋先老浮雲晝欲陰况逢憂國際誰為訪山林

章景南署中對竹

誰種此亭竹當樽一問君相看成野意自覺遠塵氛幽

色霜前見秋聲月下聞醉來堪隱几清夢入湘雲

秋夜雪後同王給事以寧集胡進士文澂宅予病

先歸

客醉黃花月堂開白雪天重城輝夜色老樹奪春妍已  
負金樽酒那成寶劍篇病來扶上馬歸向小樓眠

高比部伯宗宅夜集得清字

銅漏夜初溢冰壺韻轉清月澄天漢影風落禁鐘聲病  
裏疏身計天涯得友生後期無定所江海共含情



冬夜同徐比部子與吳舍人明可聽張肖甫鼓琴  
得聲字

夜過成都客風流羨長卿壺觴移燭影山水入琴聲庭  
敞風初斷天寒月更明他時軒冕會應記薜蘿情

送劉推官子禮之平陽

人憐燕市別才羨洛陽奇春色迎驂動民情到郡知天  
低姑射嶺雲抱帝堯祠幾為看汾水東流寄所思

送盧司業濬卿再赴南都

相憶江湖遠相逢京國初羽觴春欲動宮漏夜何如客  
久慙懷刺年衰可著書君仍金馬詔吾竟白雲居

二

陽城復南去歲晚上吳船寒盡秣陵雪春浮揚子天一  
官心自遠六代賦同傳何異碧山下蕭條著述年

冬夜黃給事用章宅同張肖甫賦得中字

初逢青瑣彥下榻一宵同月落棊聲裏春回燭影中放  
歌還楚調扶醉有巴童上苑遙相問梅花定幾叢

吳舍人明可徙居同徐子與劉子成二比部夜

集得書字

仙郎近卜居幾乘載圖書鄰里通名後牆頭過酒初漏  
沉丹禁遠燭動碧窓虛補衮才無暇明朝向石渠

春日過山村漫興

何物清人思西山對郭門漁樵春草路雞犬夕陽村水  
動烟霞色沙留杖屨痕向來擣散意一醉任乾坤

四溟集卷四